

欽  
定  
全  
唐  
文

欽定全唐文卷一百二目錄

梁太祖二

便殿聽政勅

禁滯留軍奏勅

禁科配州縣勅

令當直官於中書側近宿止勅

令刺史專達勅

令宰臣專判司門出給勅

褒韓建勅

給宰臣餐錢勅

備雨潦勅

修禳星災勅

勒停御史鄭觀現任勅

賜鄭仁誨手勅

授錢鏐吳越國王冊文

請車駕還京表

諭諸鎮檄文

與蜀王建書

與契丹阿保機書

梁末帝

即位改名制

給復宋毫等三十二州制

追復博王友文官爵詔

國忌輟朝詔

輟朝答宰臣詔

分相魏爲兩鎮詔

答賀德倫詔

賜鎮南軍節度使劉鄩詔

以曹州刺史朱珪檢校太傅充平盧軍節度使詔

舉廢官詔

禁私度僧尼詔

賞賜諸軍詔

降封惠王友能爲房陵侯詔

獎王周詔

褒安叔干詔

貸華溫琪贓罪詔

授錢鏐第三子傳瑛駙馬都尉賜鏐勅

以壽春公主選駙馬賜錢鏐勅

選錢鏐十五子傳璟爲駙馬賜鏐勅

命錢鏐進取海南劉巖勅

改元德音

報典軍趙巖書

欽定全唐文卷一百二

梁太祖二

便殿聽政勅

朕以干戈尚熾華夏未寧宜循卑菲之言用致雍熙之化  
起八月一日常朝不御金鑾崇勲兩殿只於便殿聽政

禁滯留軍奏勅

建國之初用兵未罷諸道章表皆繫軍機不欲滯留用防  
緩急其諸道所有軍事申奏宜令至右銀臺門委客省畫  
時引進諸道公事即依前四方館準例收接

欽定全唐文

卷一百二

梁太祖

一

禁科配州縣勅

所在長吏放雜差役兩稅外不得妄有科配自今後州縣府鎮凡使命經過若不執勅文券並不得妄差人驢及取索一物已上又今歲秋田皆期大稔仰所在切加條流本分納稅及加耗外勿令更有科索切戒所繇人更不得於鄉村乞託擾人

令當直官於中書側近宿止勅

公事難於稽遲居處悉皆遙遠其逐日當直中書舍人及吏部司封知印郎官少府監及篆印文兼書寫告身人吏



等並宜輪次於中書側近宿止

令刺史專達勅

魏博管內刺史比來州務並委督郵遂使曹官擅其威權  
州牧同於閒冗俾循通制宜塞異端並宜依河南諸州例  
刺史得以專達

令宰臣專判司門出給勅

司門過所先是司門郎中員外郎出給今以寇盜未平恐  
漏姦詐令宰臣趙光逢專判凡諸給過所先具狀經中書  
點簡判下即本判郎官據狀出給

褒韓建勅

許昌雄鎮太保韓建朕用之布政民耕盜止久居其位庶可勝殘矣宜令中書門下不計年月勿議替移

給宰臣餐錢勅

食人之食者憂人之事況丞相尊位參決大政而堂封未給且無餐錢朕甚愧之宜令日食萬錢之半

備雨潦勅

今載春寒頗甚雨澤仍愆司天監占以夏秋必多霖潦宜令所在郡縣告喻百姓備淫雨之患

修禳星災勅

近者星辰違度式在修禳宜令兩京及宋魏州取此月至五月禁斷屠宰仍各於佛寺開建道場以迎福應

勒停御史鄭觀現任勅

國之重典祀事爲先監察御史本虞不恪今則衆官晨興已到御史日晏方來旣紊國章難虧朝典其鄭觀宜停見任

賜鄭仁誨手勅

切慮德妃以朕至兗州行營津置內人承侍緣諸軍在野

不可自安令鄭仁誨專心體候如德妃津置內人東來便  
須上聞約住或取索鞍馬不得供應如意堅確即以手勅  
示之

授錢鏐吳越國王冊文

迺者有唐告終王政日紊婦寺亂常於內蠻貊犯順於邊  
列鎮張膽而相攻大臣捫心而無措惟思家族遑恤朝廷  
朕起自兵戎厯階節度憂皇天之不弔閔黎庶之倒懸誓  
衆興師爲民請命東征西怨共徯我后來蘇簞食壺漿咸  
若厥角墜地竟以數州之力大翦諸國之鋒厯試諸艱遂

叨九錫稽舜禹之禪法隋唐之勅天步多艱人情習亂因  
商民之思紂噬桀犬以吠堯職具不共何所不至咨爾上  
柱國吳越王錢鏐山川毓秀二五儲精以不世出之才行  
大有爲之主納交伯府翼戴中朝靖淮甸之邪氛不得紊  
我王氣斬羅平之妖鳥不得鳴我王郊迨乎受禪之初首  
遣宣諭之使頗知天命不效狂謀匪兼二國之封曷獎尊  
王之義今遣使金紫光祿大夫尚書上柱國姚洎使副尚  
書禮部主客員外羅衮持節備禮胙土分茅冊爾爲吳越  
國王嗚呼車徒萬乘何戎狄之不可膺節制三方何強梁

金史卷之二十一  
之不可伏矧百粵夏后駐蹕之地三吳泰伯肇封之疆句  
踐用之以親周夫差因之而駕晉方賴率三軍而挺荆楚  
糾列國以平淮戎允爲東海屏藩永保中原重鎮毋姑息  
以敗事毋誇大以隳功欽哉其聽朕命

請車駕還京表

臣獨兼四鎮迨事兩朝分數千里之封疆受二十年之恩  
渥微同物類猶解感知忝齒人倫寧忘報效臣昨將兵士  
奔赴闕庭尋過京畿遠迎車駕初因幕吏面奉德音尋有  
宰臣頻飛密札或以京都紛擾委制置於中朝或以鑾輅

播遷俾奉迎於近甸臣是以遠離藩鎮不憚疲勞昨奉詔  
書兼宣口勅令臣速抽兵士且歸本藩仍遣百官俾赴行  
在覲綸言於鳳紙若面丹墀認御札於龍衣如親翠蓋然  
知從來書詔出自宰臣每降宣傳皆非聖旨致臣悞將師  
旅遽入關畿比令迎駕之行翻挂脅君之過臣今見與茂  
貞要約釋兩地猜嫌早致萬乘歸京以副八紘懇望其宰  
臣百官已下非臣輒有阻留伏乞詔赴行朝以備還駕

諭諸鎮檄文

今月二十日得襄王偽詔及朱玫文字云田令孜脅遷鑾

駕播越梁洋行至半途六軍變擾遂至倉皇而晏駕不知  
弑逆者何人永念丕基不可無主昨四鎮藩后推朕纂承  
已於正殿受冊畢改元大赦者李煜出自贅疣名汙藩邸  
智昏菽麥識昧機權李符擄之以塞辭朱玫賣之以爲利  
呂不韋之奇貨可見姦邪蕭世誠之土囊期於匪夕近者  
當道徑差健步奉表起居行朝現駐巴梁宿衛比無騷動  
而朱玫脅其孤駿自號台衡敢首亂階明言晏駕熒惑藩  
鎮陵弱廟朝

闕

與蜀王建書



夫唐虞致治遵禪讓之明文湯武開基允人神之至願必有神器是膺皇圖況古今迭代之期英傑興隆之數莫不上關天命下順人心啟王霸之宏基爲子孫之大計咸遵軌轍並載簡編且念與皇帝八兄頃在前朝各封異姓土茅分裂皆超將相之尊魚鴈往來久約弟兄之契懽盟甚固功業相推俄隔絕於音塵止因緣於間諜以至時衰土德運應金行雖手足胼胝粗平多難而星辰符瑞謬付厥躬當百辟之羣情極四方之積患爰都河洛用答乾坤尋聞皇帝八兄奄有西陲盡朝三蜀別尊位號復統高深一

時皆賀於推崇兩國願通於情好徵曹劉之往制各有君  
臣追楚漢之前蹤嘗分疆宇所冀同清夷夏俱活生靈載  
籍具存恢張無爽去歲密聞風旨遐慰寤思憤岐隴之猖  
狂逼褒斜之封徼欲資牽制用速掃除遂委永平軍節度  
使劉鄩特遣行人先道深意旋已徑差精甲將擊妖巢合  
數鎮之驍雄鼓六師之威勢尋聞退遁殆至滅亡允諧犄  
角之謀尤得輔車之利近併覽同華奏報皆進呈褒祥書  
題具悉事機良多歎沃今專馳卿列備達衷懷重論金石  
之交別卜墳簾之分山河共永日月長懸瞻佇好音言不

盡意今遣光祿卿盧玘閣門副使少府少監李元聊馳書  
幣專戒道途兼有微禮具在別幅謹白

馬一十匹紅纓絡子鞍幪各一事計紅耳叱驃馬一匹金  
玉開裝四垂鞍轡一副紫叱驃馬一匹白玉裝鞍轡一副  
白驄馬一匹金鍍開裝鞍轡一副烏叱驃馬一匹金鍍龍  
鳳五垂銀鞍轡一副烏叱驃馬一匹金鍍銀開裝鞍轡一  
副白驄馬一匹金鍍銀開裝鞍轡一副青叱驃馬一匹裏  
花五垂銀鞍轡一副青叱驃馬一匹陷金玉五垂鞍轡一  
副騮叱驃馬一匹金鍍開裝五垂銀鞍轡一副紅耳叱驃

馬一匹金鍍五垂鬧裝銀鞍轡一副又玉犀腰帶雜物等  
計黃排方珽琳腰帶一條頭尾順缺十二事通牡丹犀排  
方腰帶一條頭尾順缺十二事金香一十斤麝香五十劑  
犀一十株琥珀二十斤玳瑁二百斤金稜琉璃碗十隻銀  
稜祕色鈔鑼二面金花銀裝厨子一對金花渾銀裹龍鳳  
儀注槍四條并鞘子犂牛紅拂子全金花銀裹龍鳳儀注  
槍四十條綾袋盛金銅甲二副并副膊兜鍪全又藥物十  
三位計茯苓一十斤茯神一十斤酸棗仁五十斤玉鹽五  
斤新羅人蓂一十斤牛膝一十斤枳殼一十斤五味子五

斤赤箭一十斤鹿茸一十對顆棗一千枚羚羊角五對牛黃一百銖右件藥物等或來從燕市或貢自炎方或馨香能助於薰爐或華妙可資於寶翫光涵星斗藥有君臣願伸兩國之情重固千年之約愧非縉禮粗達深衷特希檢留幸甚謹白

與契丹阿保機書

朕今天下皆平惟有太原未服卿能長驅精甲徑至新莊爲我翦彼仇讎與爾便行封冊

梁末帝

帝諱瑱初名友貞太祖第四子唐文德元年生開平元年封均王乾化三年二月即位改名鐔末年改今名在位十一年年三十六

即位改名制

朕仰膺天睠近雪家讎旋聞將相之謀請紹祖宗之業羣情見迫三讓莫從祇受推崇懼不負荷方欲烝嘗寢廟裡類郊丘聿徵定體之辭用表事神之敬其或於文尚淺在理未周亦冀隨時別圖制義雖臣子行孝重更名於已孤而君父稱尊貴難知而易避今則虔遵古典詳考前聞允

諧龜筮之占庶合帝王之道載惟涼德尤愧嘉名中外羣  
寮當體朕意宜改名隍

給復宋毫等三十二州制

王者愛育萬方慈養百姓恨不驅之以仁壽撫之以淳和  
而炎黃有戰伐之師堯舜有干戈之用諒不獲已其猶病  
諸然則去害除妖興兵動衆殺黑龍而濟中土刑白馬而  
誓諸侯終能永逸暫勞以至同文共軌古今無異方冊具  
存朕以眇末之身託億兆之上四海未乂八年於茲業業  
兢兢日慎一日雖踰山越海肅慎方來而召雨徵風蚩尤

尚在顧茲殘孽勞我大邦將士久於戰征黎庶疲於力役  
本年木牛暫息則師人有不爨之憂流馬盡行則丁壯有  
無聊之苦況青春告謝朱夏已臨妨我農時迫我戎事永  
言大計思致小康宜覃在宥之恩稍示殷憂之旨用兵之  
地賦役實煩不有蠲除何使存濟除兩京已放免外應宋  
毫輝潁鄆齊棣滑鄭濮沂密青登萊淄陳許均房襄鄧沁  
隨陝華雍晉絳懷汝商等三十二州應欠貞明四年已前  
夏秋兩稅并鄆齊滑濮襄晉輝等七州兼欠貞明四年已  
前營田課利物色等並委租庸使逐州據其名額數目矜



放所在官吏不得淹停制命徵督下民致恩澤不及於鄉閭租稅虛捐於帳籍其有私放遠年債負生利過倍自違格條所在州縣不在更與徵理之限究州城內自張守進違背朝廷結連蕃寇久勞攻討頗困生靈言念傷殘尋加給復應天下見禁罪人犯大辟合抵極刑者宜示好生特令減死除準格律常赦不原外徒流以下遞減一等左降官未經量移者與量移已量移者更與復資

追復博王友文官爵詔

我國家賞功罰罪必叶朝章報德伸冤敢欺天道苟顯違

於法制雖暫滯於歲時終振大綱須歸至理重念太祖皇帝嘗開霸府有事四方迨建皇朝載遷都邑每以主留重務居守難才慎擇親賢方膺寄任故博王友文才兼文武識達古今俾分憂於在浚之郊亦共理於興王之地一心無易二紀於茲嘗施惠於士民實有勞於家國去歲郢王友珪嘗懷逆節已露凶鋒將不利於君親欲竊窺於神器此際值先皇寢疾大漸日臻博王乃密上封章請嚴宮禁因以萊州刺史授於郢王友珪纔覩宣頭俄行大逆豈有自縱兵於內殿卻翻事於東都又矯詔書枉加刑戮仍奪

博王封爵又改姓名寃恥兩深誑欺何極伏賴上元垂祐  
宗社降靈俾中外以叶謀致遐邇之共怒尋平內難獲勦  
元凶旣雪恥於同天且免譏於共國朕方期遁世敢竊臨  
人遽迫推崇爰膺續嗣寃憤旣伸於幽顯霈澤宜及於下  
泉博王宜卻復官爵仍令有司擇日歸葬

國忌輟朝詔

太祖皇帝六月二日大忌朕聞姬周已還並用通喪之禮  
炎漢之後方行易月之儀歷代相沿萬幾斯重遂爲故實  
難遽改更朕頃邁家寃近平內難倏臨祥制俯迫忌辰音

容永遠而莫追號感彌深而難抑將欲表宅憂於中禁是  
宜輟聽政於外朝雖異常儀願申罔極宜輟五月二十二  
日至六月二十九日朝參軍機急切公事即不得留滯並  
仰晝時聞奏施行

輟朝答宰臣詔

朕聞禮非天降固可酌於人情事繫孝思諒無妨於國體  
今以甫臨忌日暫輟視朝冀全哀戚之情用表始終之節  
宰臣等累陳章表備述古今慮以萬幾之繁議以五日之  
請雖茲懇切難盡允俞況保身方荷於洪基敢言過毀而

權制獲申於至性必在得中宜自今月二十九日輟至六月七日無煩抑請深體朕懷

分相魏爲兩鎮詔

分疆裂土雖賞勲勞建節屯師亦從機便比者魏博一鎮巡屬六州爲河朔之大藩實國家之巨屏所分憂寄允謂重難將叶事機須期通濟但緣鎮定賊境最爲魏博親隣其次相衛兩州皆控澤潞山口兩道並連於晉土分頭常寇於魏封旣須日有枝梧未若俱分節制免勞兵力困奔命於兩途稍泰人心俾安居於終日其相州宜建節爲昭

德軍以澶衛兩州爲屬郡以張筠爲相州節度使

答賀德倫詔

魏博寇敵接連封疆懸遠凡於應赴須在師徒是以別建節旄各令捍禦并鎮則委魏博控制澤潞則遣相衛枝梧咸遂便安貴均勞逸已定不移之制宜從畫一之規至於征伐事權亦無定例且臨清王領鎮之日羅紹威守藩以來所領事銜本無招討祇自楊師厚先除陝滑二帥皆以招討兼權因茲帶過鄴中原本不曾落下苟循事體寧悞施行況今劉鄩指鎮定出征康懷英往邠岐進討祇令統

率師旅亦無招討使銜切宜徧諭羣情勿興浮議倚注之意卿宜體之

賜鎮南軍節度使劉鄩詔

閩外之事全付將軍河朔諸州一旦淪沒勞師弊旅患難日滋退保河壩久無鬪志昨東面諸侯奏章來上皆言倉儲已竭飛輓不充于役之人每遭擒擄夙宵軫念惕懼盈懷將軍與國同休當思良畫如聞寇敵兵數不多宜設機權以時翦撲則予之負荷無累先人

以曹州刺史朱珪檢校太傅充平盧軍節度使詔

行營諸軍馬步都虞候匡國軍節度觀察留後朱珪昨以  
寇戎未滅兵革方嚴所期朝夕之間克弭烟塵之患每於  
將帥別注憂勞而謝彥章孟審澄侯溫裕忽構異圖將萌  
逆節賴朱珪挺施貞節密運沈機果致梟擒免資讎敵特  
加異殊之命用旌忠孝之謀便委雄藩俾荷隆渥可檢校  
太傅充平盧軍節度淄青登萊等州觀察處置押新羅渤  
海兩蕃等使兼行營諸軍馬步軍副都指揮使仍進封沛  
國郡開國侯

舉廢官詔



應文武朝官或有替罷多年漂流在外者宜令中書門下量才除授勿使栖遲或有進士策名累年未釋褐者與初任一官已釋褐者依前資敘用

禁私度僧尼詔

兩都左右街賜紫衣及師號僧委功德使具名聞奏今後有關方得奏薦仍須道行精至夏臘高深方得補填每遇明聖節兩街各許官壇度七人諸道如要度僧亦仰就京官壇仍令祠部給牒今後只兩街置僧錄諸道僧正並廢

賞賜諸軍詔

郊禋大禮舊有渥恩御殿改元比無賞給今則不循舊例  
別示特恩其行營將士賞賚已給付本家宜令招討使霍  
彥威副招討使王彥章陳州行營都指揮使張漢傑曉示  
諸軍知悉

降封惠王友能爲房陵侯詔

朕君臨四海子育兆民惟持不黨之心庶叶無私之運其  
有齒予戚屬雖深敦敘之情干我國經難固含宏之旨須  
遵常憲以示至公特進檢校太傅使持節陳州刺史兼御  
史大夫上柱國食邑三千戶惠王友能列爵爲王頒條治

郡受元戎之寄任處千里之封疆就進官資已登崇貴時  
加錫賚以表優隆宜切知恩合思盡節撫俗當申於仁政  
佐時期效於忠規而狎彼小人納其邪說忽稱兵而向闕  
敢越境以殘民侵犯郊畿驚撓輦轂遠邇咸嫉謀畫交陳  
及興問罪之師旋驗知非之狀瀝懇繼陳於章表束身願  
赴於闕庭備述艱危覬加寬恕朕得不自爲屈已姑務安  
仁特施貸法之恩蓋舉議親之律詢於事體抑有朝章止  
行退責之文用塞衆多之論可降封房陵侯於戲君臣之  
體彼有不恭伯仲之恩予垂立愛顧茲輕典豈稱羣情凡

在臣寮當體朕意

獎王周詔

王周佐國賢臣殿邦良帥戰伐之功顯著葺綏之政尤彰  
昨者殄寇常山總戎涇水安邊靜塞克施撫馭之方察俗  
觀風盡去煩苛之弊備陳條件足驗公清一方旣洽於詠  
歌百姓頓期於蘇息王周宜賜詔獎

褒安叔干詔

安叔干折獄惟良化民有術治彼無訟使之知禁鳴抱息  
於砥路茂草生於園土求之古人何以臻此三載考績不

志明允之能五刑有服無違中正之道以斯爲政良可嘉焉

貸華溫琪贓罪詔

朕若不與鞠究謂予不念赤子若遂行典憲謂予不念功臣爲子君者不亦難乎其華溫琪所受贓宜官給代還所訟之家

授錢鏐第三子傳瑛駙馬都尉賜鏐勅

勅吳越國王錢鏐朕念敬尊元老禮無出於父師崇樹華姻事莫先於婚媾故金張貴族方膺下嫁之榮齊宋大邦

始稱和鳴之兆恭惟先帝與卿素同盟約誓掃寇讎遠裨  
締構之功終集興隆之運雖崇資厚祿酬勲已極於當時  
而懿戚周親結分思聯於奕世尋期愛女欲配高門三邊  
未息於戎機百兩遂稽於宿諾今朕祗膺天眷獲嗣皇圖  
念三年無改之規思二姓好逑之重願遵先旨特舉令儀  
況傳瑛驪頷奇光鳳毛異彩不俟折筭之訓已當壓紐之  
祥媯汭名門雅稱太姬之匹張敖顯族宜承元女之姻是  
用先降徽章特加異數擅齋壇之斧鉞兼台室之鈞衡旣  
明必復之徵且展維私之分料卿精識體朕至懷今授傳

瑛大同軍節度使檢校太傅同中書門下平章事駙馬都尉兼加食邑八百戶

以壽春公主選駙馬賜錢鏐勅

勅給事中韋彖等到鎮選尚今陳讓恩命事具悉卿六朝元老一代純臣挺金石之心功參締構識風雲之會力贊邦家歌鐘不足以宣猷簡冊尋盈於編紀所以先帝頃在潛龍之際欲敦鳴鳳之文擇彼芝蘭聘於骨肉及開張運祚巡狩寰區雖媯汭降嬪未行嘉禮而晉原埋土不享修齡朕去歲特輟近班俾道遺訓冀諧良匹別付至親卿又

過執謙沖遠形辭避且知子莫若父知臣莫若君將相聯  
榮公王疊慶豈無令器可奉明恩勿堅撓抑之儀速副選  
求之旨佇行制命勉沃朕懷欽重之餘延矚無已

選錢鏐十五子傳璟爲駙馬賜鏐勅

卿功高鼎鉉爵極土茅光紀年繫月之書等巢閣負圖之  
瑞朕自惟寡薄猥荷基扈唯於舊勲敢墜先志所以再謀  
選尚用洽姻親況卿男傳璟學禮聞詩資忠履孝前代則  
何郎風貌克著嘉名近朝則郭令功崇爰推愛子旣臻具  
美須降明恩俾升右揆之榮兼正九卿之秩奉車增貴鳴



玉趨朝騁騏驎之修途契鳳凰之吉兆眷戀之外慰沃良  
深今授傳璟檢校尚書右僕射守司農卿駙馬都尉已從  
別勅處分想宜知悉

命錢鏐進取海南劉巖勅

勅曰朕聞越紀亂常前王無赦懲惡勸善有國不私苟罪  
惡以顯彰在刑名而何逭其有身當殊寵既受國恩敢行  
不軌之心具驗速辜之跡頒行典憲仍令詰諸靖海建武  
等軍節度使上柱國平南王劉巖頃因乃父發跡本藩尋  
賴其兄致身賓席受先朝之拔擢極上將之寵權念其尊

獎之誠許繼藩宣之任乃自行軍之職繼膺推轂之恩秩  
進三司位同四輔自朕獲承大寶累進崇資一門無比其  
超榮百世豈疇其寵耀而敢飛章不紀希寵無厭始求都  
統四隣後請封王南越貪饕斯甚踰僭無階朕每含容再  
伸優渥授之東鎮加以南平比罔思止足益恣凶狂妄稱  
漢室遺宗欲繼尉佗醜跡結連淮海阻塞梯航徒惑遠方  
僭稱大號在人情而共棄豈天道以能容宜命討除用清  
逆亂爾天下兵馬都元帥錢鏐志扶社稷任總兵師每興  
憤激之辭願舉誅夷之令是用俾爾元老討彼叛臣先行

奪爵之文爰舉摧凶之典劉巖在身官爵並宜削奪於戲  
將相重任子孫殊榮不能常守於藩修而乃自干於國典  
指凶殘而必取念染污以將新非我無終始之恩實彼有  
滿盈之罪凡百珍重悉體朕懷

改元德音

朕聞惟辟動天惟聖時憲故君爲善則降之以福爲不善  
則降之以災朕以眇末之身託於王公之上不能荷先帝  
艱難之運所以致蒼生塗炭之危兵革薦興災害仍集內  
省厥咎蓋由朕躬故北有邊裔狡逞之師西有蒲同亂常

之旅連年戰伐積歲轉輸虔劉我士民侵據我郡邑師無  
宿飽之饋家無擔石之儲而又水潦爲災蟲蝗作沴戒譴  
作於上怨咨聞於下而沉骨肉之內竊弄干戈畿甸之中  
輒爲陵暴但責躬而罪已敢怨天以尤人蓋朕無德以事  
上穹無功以及兆庶不便於時者未能去有益於民者未  
能行處事昧於酌中發令乖於至當招致災患引翼禍殃  
罪在朕躬不敢自赦夙夜是懼寢食靡寧將勵已以息災  
爰布澤而從欲今以薰風方扇旭日初昇朔旣視於正陽  
厯宜更於嘉號庶惟新之令敷華夏以同歡期克念之心

與皇王而合道其貞明七年宜改爲龍德元年應天下見  
禁罪人除大辟罪外遞減一等德音到後三日內䟽理訖  
奏應欠貞明三年四年諸色殘欠五年六年夏稅殘稅並  
放侍衛親軍及諸道行營將士等第頒賜優賞已從別勅  
處分左降官與量移已經量移者與復資長流人各移近  
地已經移者許歸鄉里前資朝官寄寓遠方仰長吏津置  
赴闕内外文武常參官節度使留後刺史父母亡歿者並  
與封贈公私債負納利及一倍已上者不得利上生利先  
經陣歿將校各與追贈

報典軍趙巖書

夷門太祖創業之地居天下之衝北拒并汾東至淮海國  
家藩鎮多在厥東命將出師利於便近若都洛下非良圖  
也公等如堅推戴冊禮宜在東京賊平之日即謁洛陽陵  
廟

欽定全唐文卷一百三目錄

後唐太祖

上昭宗自訴表

報西川王建書

北嶽廟題名

後唐莊宗

親決疑獄令

嚴科市井凶豪令

徇邢洺魏博衛滑諸郡縣令

平魏博令

諭曹濮百姓教

褒回鶻權知可汗仁美制

伐蜀制

幸洛京詔

慮囚詔

賜誠惠法號廣法大師詔

黜鄭珏等詔

入汴州誅亂臣詔



允郭崇韜再讓節鎮優詔

建長壽宮詔

答郭崇韜陳情表手詔

答郭崇韜再上陳情表詔

慎選舉詔

禁鉛錫錢詔

賜功臣名號詔

封命婦邑號詔

令諸道節度使等洛京修宅詔

減東京賦稅詔

駕還洛京詔

定考試例詔

求言詔

欽定全唐文卷一百三

後唐太祖

帝姓朱耶氏賜姓李諱克用其先隴右金城人唐大中十年生始祖拔野貞觀中從太宗討高麗有功爲沙陀都督子孫代襲帝初爲雲中牙將累官司空龍紀元年封隴西郡王乾寧二年進封晉王天祐五年正月薨年五十三同光元年追諡武皇帝廟號太祖

上昭宗自訴表

晉州長寧關使張承暉於當道錄到張濬榜并詔曰張濬

充招討制置使令率師討臣兼削臣屬籍官爵者臣誠冤  
誠憤頓首頓首伏以宰臣張濬欺天蔽日廊廟不容讒臣  
於君奪臣之位憑燕帥妄奏與汴賊結恩矯託皇威擅宣  
王命徵集師旅撓亂乾坤誤陛下中興之謀資黔黎重傷  
之困臣實何罪而陛下伐之此則宰臣持權而欺陛下況  
臣父子三代受恩四朝破徐方救荆楚收鳳闕碎梟巢致  
陛下今日冠通天之冠佩白玉之璽臣之屬籍懿皇所賜  
臣之師律先帝所命臣無逆節濬討何名陛下若厭逐功  
臣欲用文吏自可遷臣封邑以侯就第柰何加諸其罪孰

肯無詞若以臣雲中之伐獲罪於時則拓拔思恭取鄜延  
朱全忠侵徐鄆陛下何不討之假令李孝德不忠於主伐  
之爲是則朱瑄時溥有何罪耶此乃同坐而異名賞彼而  
誅此使天下藩服強者扼腕弱者自動流言竊議爲臣怨  
嗟固非中興之術也且陛下阽危之秋則獎臣爲韓彭伊  
霍旣安之後罵臣曰戎羯蕃夷海內握兵立事如臣者衆  
矣寧不懼陛下他時之罵哉臣昨遇燕軍以禮退舍匡威  
淺昧厚自矜誇乃言臣中矢石覆士卒致內外吠聲一發  
短謀競陳誤陛下君臣之分況命官選將自有典刑不必

幸臣之弱而後取之儻臣延期挺命尚固一方彼實何顏  
以見陛下此則姦邪朋黨輕弄邦典陛下凝旒端扆何由  
知之今張濬既已出軍微臣固難束手臣便欲叫闥輕騎  
面叩玉階訴邪佞於陛下之彤墀納詔命於先皇之宗廟  
然後束身司敗甘處憲章

報西川王建書

竊念本朝屯否巨業淪胥攀鼎駕以長違撫彤弓而自咎  
默默終古悠悠彼蒼生此厲階永爲痛毒視橫流而莫救  
徒誓楫以興言別奉函題過垂獎諭省覽周旣駭惕異常

淚下霑衿倍鬱申胥之素汗流浹背如聞蔣濟之言僕經  
事兩朝受恩三代位叨將相籍係宗支賜鈇鉞以專征徵  
包茅而問罪鑒兵接戰二十餘年竟未能斬新莽之頭顱  
斷蚩尤之肩髀以至廟朝顛覆豺虎縱橫且受任分憂叨  
榮冒寵龜玉毀櫝誰之咎歟備閱指陳不勝慚慙然則君  
臣無常位陵谷有變遷或箠塞長河泥封函谷時移事改  
理有萬殊即如周末虎爭魏初鼎據孫權父子不顯授於  
漢恩劉備君臣自微興於涿郡得之不謝於家世失之無  
損於功名適當逐鹿之秋可斬華蟲之服惟僕累朝席寵

金史卷之三  
奕世輸忠忝佩訓詞粗存家法善博奕者惟先守道治蹊  
田者不可奪牛誓於此生靡敢失節仰憑廟勝蚤殄寇讎  
如其事與願違則共臧洪遊於地下亦無恨矣唯公社稷  
元勲華嵩降祉鎮九州之上地負一代之宏才合於此時  
自求多福所承良訊非僕深心天下其謂我何有國非吾  
節也悽悽孤懇此不盡陳

北嶽廟題名

河東節度使檢校太保同中書門下平章事隴西郡王李  
克用以幽鎮侵擾中山領蕃漢步騎五十萬衆親來救援



與易定司空同申祈禱翌日過常山問罪時中和五年二月廿一日克用記

至三月十七日以幽州請就和斷遂却班師再謁晬容兼申賽謝便取飛狐路却歸河東廿一日克用重記

### 後唐莊宗

帝諱存勗太祖長子唐光啟元年生年十一授檢校司空隰州刺史天祐五年嗣封晉王二十年四月築壇魏州即帝位同光二年加尊號昭文睿武至德光孝皇帝在位四年年四十二諡曰光聖神閔孝皇帝廟號莊宗

親決疑獄令

議獄恤刑比求冤濫頑民下輩輕侮憲章苟非五聽之通明何辨二門之邪正自今後法司如有疑獄予自據格令以決之此法既行雖親無赦

嚴科市井凶豪令

兵亂以來生靈凋耗豈止賦租煩重加之寇盜侵漁又聞市井之中多有凶豪之輩晝則聚徒蒲博夜則結黨穿窬若不示以嚴科何以懲其巨蠹仰法司顯行條令峻設隄防

徇邢洺魏博衛滑諸郡縣令

王室構屯七廟被陵夷之酷昊天不弔萬民罹塗炭之災  
必有英主奮庸忠臣仗順斬長鯨而清四海廓祆祲以泰  
三靈予位忝維城任當分閫念茲顛覆詎可晏安仗桓文  
節制之規問羿浞凶狂之罪逆溫碭山傭隸巢孽餘凶當  
僖宗奔播之初我太祖掃平之際束身泥首請命牙門包  
藏姦詐之心惟示婦人之態我太祖俯憐窮鳥曲爲開懷  
特發表章請帥梁汴纔出萑蒲之澤便居茅社之尊殊不  
感恩遽行猜忍我國家祚隆周漢迹盛伊唐二十聖之鑑

基三百年之文物外則五侯九伯內則百辟千官或代襲簪纓或門傳忠孝皆遭陷害永抱沈冤且鎮定兩藩國家巨鎮冀安民而保族咸屈節以稱藩逆溫唯仗陰謀專行不義欲全吞噬先據屬州趙王特發使車來求援助予情惟盪寇義切親仁躬率賦輿赴茲盟約賊將王景仁將兵十萬屯據柏鄉遂驅三鎮之師授以七擒之略鸛鵲纔列梟獍大奔易如走坂之九勢若燎原之火僵屍仆地流血成川組甲彫戈皆投草莽謀夫猛將盡作俘囚羣凶旣快於天誅大慙須懸於鬼錄今則選蒐兵甲簡練車徒乘勝

長驅翦除元惡凡爾魏博邢洺之衆感恩懷義之人乃祖  
乃孫爲聖唐赤子豈徇虎狼之黨遂忘覆載之恩蓋以封  
豕長蛇憑陵薦食無方逃難遂被脅從空嘗膽以銜冤竟  
無門而雪憤旣聞告捷想所慰懷今義旅徂征止於招撫  
昔耿純焚廬而向順蕭何舉族以從軍皆審料興亡能圖  
富貴殊勲茂業翼子貽孫轉禍見幾決在今日如能詣轅  
門而效順開城堡以迎降長吏則改補官資百姓則優加  
賞賜所經註誤更不推窮三鎮諸軍已申嚴令不得焚燒  
廬舍剽掠馬牛但仰所在生靈各安耕織予恭行天伐罪

止元凶已外歸明一切不問凡爾士衆咸諒予懷

平魏博令

我國家列爵䟽封皆循舊制建藩維而命宗子錫茅社以  
報功臣惟茲魏邦纘乃舊服自逆溫肇亂天下分離謀害  
忠良窺覬藩翰遂使公侯之國鞠爲蛇虺之場朱友貞叢  
陋餘妖人神共棄不量其力謂秦無人尚爲貽厥之謀巧  
設兼并之計改張節制分割山河連薨皆弊於誅求編戶  
不安於間井且人爲邦本君乃民天旣興虐我之謀須起  
俟予之嘆遂至桓桓列校擾擾齊吐奮白挺以捐生潔壺

漿而望主予叨居閫政誓復聖唐永念生靈嘗生軫惻覩  
茲殘弊尤切疚懷昨百姓三軍請予兼領茲凶在近鎮撫  
尤難賴爾衆多共宣忠力切以軍府變更之後人情易動  
難安將務輯寧須嚴法令凡訛言謗議殘物害人結黨連  
朋抵刑犯禁如當糾告法固難容凡爾蒸人勉其自勵布  
告中外咸使聞知

諭曹濮百姓教

千紀亂常人神共怒殺君盜國天地何容激忠良仗順之  
心拯黎庶倒懸之急予爰從近歲親舉義師每惟戡難之

謀所切弔民之志而賊黨不分逆順憑附妖凶唯偷晷漏  
之生不慮覆亡之禍去秋予暫歸寧覲留侍并都賊將王  
瓚輒渡洪河偷營巢穴不敢前來決戰遠出交兵壁閉偷  
安可知羸懦予親臨賊壘率士登城賊遂出營門與吾合  
戰纔交鋒刃便委干戈戮甲士二萬餘人奪鐵騎三千餘  
匹散千李立之輩已疊鼓於軍前拱宸侍衛之徒盡橫屍  
於大野所殘無幾不日翦除料彼友貞難逃鈇鉞豈能保  
完生聚禦捍疆陲予昨徑出偏師徇地曹濮閱其蒸庶懼  
此百殃空多轉餉之勞殊失保全之望予示其禍福各擇



安危勿附賊以亡家須決機而保族若能自攜老幼歸我  
封巡亦議撫綏俾令蘇息如懷鄉戀土苟免待時則須遠  
避兵鋒慎於去就佇平凶醜冀復鄉園其諸軍兵士州縣  
長吏等自解圍上黨對陣柏鄉莘縣交兵楊劉接戰亦合  
諳吾機略可料興衰何必阿附元凶自貽伊戚不如嚮義  
自卜永圖旦旦之懷元元共悉

裒回鶻權知可汗仁美制

回鶻可汗仁美代襲驍雄生知義烈乘北方忠順之氣爲  
南面沙漠之君自列聖有國之初便申盟誓及肅宗中興

之運繼立勲庸邇來貢奉不違戎馬無警一心嘗保於甥  
舅萬里或結於姻親今則興服之初獻琛俄至仍聞撫寧  
七部兼且控制諸蕃終姓之道無偷信言必復嗣緒之文  
斯在典冊宜行俾紹前修且明久要宜封爲英義可汗仍  
令所司擇日備禮冊命

### 伐蜀制

朕以夙荷丕基乍平僞室非不欲寵綏四海協和萬邦廣  
正朔以遐同俾人倫之有序其或地居陬裔位極驕奢殊  
乖事大之規但蘊偷安之計則必徵諸典訓振以皇威爰

興伐罪之師冀遏亂常之黨蠢茲蜀主世負唐恩間者父  
總藩宣任居統制屬朱溫東離汴水致昭皇西幸岐陽而  
乃不務扶持反懷顧望盜據劍南之土宇全虧閩外之忱  
誠先皇帝早在并門將興霸業彼旣曾馳書幣此亦復展  
謝儀後又特發使人專持聘禮彼則更不迴一介之使答  
咫尺之書星歲俄移歡盟頓沮朕頃遵崇遺訓嗣統外藩  
追昔日之來誠繼先皇之舊好又專持信幣皆絕酬還緬  
惟背恩食言可忍棄同即異今觀孽豎紹據山河委閩官  
以持權憑阻修而僭號早者曾上秦王緘札張皇蜀地聲

塵形侮瀆之言辭謗親賢之勲德昨朕風驅銳旅電掃凶  
渠復已墜之宗祧續中興之厯數捷音旋報復命仍稽使  
來而上抗書題情動而先誇險固加以宋光葆輒陳狂計  
別啟奸謀將欲北顧秦州東窺荆渚人而無禮罪莫大焉  
昨客省使李嚴奉使銅梁近歸金闕凡於奏對備述端由  
其宋光嗣相見之時於坐上便有言說先問契丹強弱次  
數秦王是非度此包藏可見情狀加以疏遠忠直朋比姦  
邪內則縱恣輕華競貪寵位外則滋彰法令蠹耗生靈旣  
德力以不量在人祇之共憤今命興聖宮使魏王繼岌充

西川四面行營都統仍命侍中樞密使郭崇韜充西川東  
北面行營都招討制置等使荆南節度使高季興充西川  
東南面行營都招討使鳳翔節度使李曦充都供軍轉運  
應接等使同州節度使李令德充行營招討副使陝州節  
度使李紹琛充行營蕃漢馬步軍都排陣斬斫使兼馬步  
軍都指揮使西京留守張筠充西川管內安撫應接使華  
州節度使毛璋充行營左廂馬步都虞候邠州節度使董  
璋充行營右廂馬步都虞候客省使李嚴充西川管內招  
撫使總領關下諸軍兼四面諸道馬步兵士取九月十八

金定卷之三  
日進發凡爾中外宜體朕意

幸洛京詔

自古聖帝明王創業垂統九州共貫五運相承未有不始於憂勤終於逸樂故苗人不作不能成舜伐之功葛伯不生無以立湯征之事理亂有常數文質爲大綱秦不道而漢室興隋無德而皇朝王連二十葉垂三百年自釁起河南災纏海內朕自提戎律切爲國讎每親統夫師徒欲早寧乎寰宇近者諸方侯伯疊貢牋章勸即位以皆堅讓體元而不獲爰新鳳厯尋揭鷄竿顯造丕圖倍慚涼德蓋自

文班武列抱義懷忠共傾忻戴之心遂應紹開之運以正君臣之位以安宗社之基未偃武以修文倍宵衣而旰食不以萬乘自尊爲樂惟以八紘未靜爲憂更賴上下一心內外同力誠嚴朕軍旅撫恤朕黎甿務裨贊以爲常期清平而可待注屬繫倚不捨斯須

慮囚詔

刑以秋冬雖關惻隱罪多連累翻慮滯淹若或十人之中止爲一夫抵死豈可以輕附重禁錮逾時言念哀矜又難全廢其諸司囚徒罪無輕重委本司據罪詳斷申奏輕者

即時䟽理重者候過立春至秋分然後行法如是事繫軍機須行嚴令或謀逆惡或蓄姦邪或行劫殺人難於留滯並不在此限

賜誠惠法號廣法大師詔

誠惠驚嶺名流鷄園上哲精守護鵝之戒宏宣住鴈之談潛括三乘深明四諦忍草長新於性苑意花不染於情田自隱跡靈峯棲心勝地泛慈舟而拯溺持慧炬以引迷五百龍神皆降懿德一萬聖衆盡繼元蹤爲法雨之棟梁作空門之標表朕方興景運大闡真風宜旌積行之名以奉



無爲之教今賜號廣法大師賜紫衣

黜鄭珏等詔

懲惡勸善務振紀綱激濁揚清須明真僞蓋前王之令典  
爲歷代之通規必按舊章以令多士而有志萌僭竊位忝  
崇高累世官而皆受唐恩貪爵祿而但從僞命或居台鉉  
或處權衡或列近職而預機謀或當峻秩而掌刑憲事分  
逆順理合去留僞宰相鄭珏等一十一人皆本朝簪組儒  
苑品流雖博識多聞備明今古而修身慎行頗負祖先昧  
忠貞而不度安危專利祿而全虧名節合當大辟無恕近

親朕以纘嗣丕基初平巨慙方務好生之道在行含垢之恩湯網垂仁既矜全族舜刑投裔兼貸一身爾宜自新我全大體其爲顯列不並庶寮餘外應在周行悉仍舊貫凡居中外咸體朕懷

入汴州誅亂臣詔

朕旣殄僞庭顯平國患好生之令含宏雖切於予懷懲惡之規決斷難違於衆請況趙巖趙鵠等自朕收城數日布惠四方尚匿迹以潛形罔悛心而革面須行赤族以謝衆心其張漢傑昨於中都與王彥章同時俘獲此際未詳行

止偶示哀矜今旣上將陳詞羣情激怒往日旣彰於僭濫  
此時難漏於網羅宜寘國刑以塞羣論除妻兒骨肉外其  
他疏屬僕使並從釋放敬翔李振首佐朱溫共傾唐祚屠  
害宗屬殺戮朝臣旣寰宇以皆知在人神而共怒敬翔雖  
聞自盡未豁幽冤宜與李振並族於市疏屬僕使並從原  
宥朱圭素聞狡蠹唯務讒邪鬪惑人情枉害良善將清內  
外須切去除況衆狀指陳亦宜誅戮契丹實刺鄂博旣棄  
其母又背其兄朕比重懷來厚加恩渥看同骨肉錫以姓  
名兼分符竹之榮疊被頒宣之渥而乃輒孤重惠復背明

庭罔顧欺違竄歸僞室旣同梟獍難貸刑章可并妻子同戮於市其朱氏近親趙鵠正身趙巖家屬仰嚴加擒捕其餘文武職員將校一切不問

允郭崇韜再讓節鎮優詔

朕以卿久司樞要常處重難或遲疑未決之機詢諸先見或憂撓不定之事訪自必成至於贊朕丕基登茲大寶衆興異論卿獨堅言天命不可違唐祚必須復請納家族明設誓文及其密取汶陽興師入不測之地潛通河口貢謀占必濟之津人所不知卿唯合意迨中都嘯聚羣黨窺陵

朕決議平妖兼收浚水雖云先定更審前籌果盡贊成悉  
諧沈算斯即何須冒刃始顯殊庸況常山陸梁正虞未復  
卿能撫衆共定羣心惟朕知卿他人寧表所以賞卿之寵  
實異等倫沃朕之心非虛渥澤今卿再三謙遜重疊退辭  
始納常陽請歸上將又稱梁苑不可兼權如此周身貴全  
名節古人操守未可比方旣覽堅辭難阻來表其再讓汴  
州所宜依允

建長壽宮詔

皇太后母儀天下子視羣生當別建宮闈顯標名號冀因

稱謂益表尊嚴宜以長壽宮爲名

答郭崇韜陳情表手詔

卿名高釣渭才大築巖夙符封社於周王早契夢魂於殷  
主顧君臣之際會實社稷之威靈所以翊贊沖人續承丕  
祚頃歲以梁城構逆唐室罹災羣凶競起於萑蒲九廟皆  
生於禾黍忍恥而徒思嘗膽平居而未見沃心爾能竭迺  
沈謀資予大計遂訓齊虎旅平殄梟巢文軌混同梯航盡  
入延景運於綴旒之後建殊庸於誓帶之前況今纔告類  
於郊壇方卜年於洛宅始欲與卿平章理道講貫化源長

遵馭朽之規每聽從繩之諫雖遷廊廟尚委樞機縱領藩  
垣不離都輦而又別頒金篆求佐瑤圖今則忽睹表章遽  
辭繁總進退徒聞於知足始終寧稱於注懷是宜勵力扶  
持勉思翼戴旣叶雲從之義更深日益之功將致君而須  
厯重權方爲主而難持謙柄覽卿陳乞俾我焦勞宜體朕  
懷卽斷來表

答郭崇韜再上陳情表詔

卿忠孝有稱古今無比竭智術而扶持景運蹈謙和而統  
冠羣英鬱有勲庸刊於簡冊昨以翦平元惡開拓丕基權

謀雖出於朕懷叶賛全資於爾力是乃委司鈞軸任總兵  
符樞機兼掌於金藏盟約備頒於鐵券實諧倚注雅稱褒  
隆豈期忽覽封章堅辭密務在卿幽明監德内外推仁可  
保於千載一時何軫於前思後慮況朕綏寧寰海纔欲半  
年告類圓丘未踰一月耆德便歸退靜羣情莫測其緣方  
賴嘉謀永裨闕政卿宜勉持幹恪永倦繁難更圖遠大之  
功共保初終之道

慎選舉詔

近年文士輕視格條就試時䟽於帖經登第後恥於赴選



宜絕躁求之路別開獎勸之門其進士科已及第者計選數年滿日許令就中書陳狀於都堂前各試本業詩賦判文其中文藝灼然可取者便與除官如或事業不甚精者自許準添選

### 禁鉛錫錢詔

泉布之弊雜以鉛錫惟是江湖之外盜鑄尤多市肆之間公行無畏因是綱商挾帶舟楫往來換易好錢藏貯富室實爲蠹弊須有條流宜令京城諸道於坊市行使錢內點檢雜惡鉛錫錢並宜禁斷沿江州縣每有舟船到岸嚴加

覺察不許將雜鉛錫惡錢往來換易好錢如有私載並行  
收納

賜功臣名號詔

朕自削平中夏掃蕩羣凶被介冑以征行厯星霜而扈從  
凡經百戰盡立殊功永念丹心真同赤子若無旌賞豈表  
恩榮其都將官員自司空已下者並賜協謀定亂佐國功  
臣自僕射尚書常侍至大夫中丞宜並賜忠勇拱衛功臣  
其初帶憲銜宜並賜忠烈功臣已有功臣名者不在此限  
其節級長行軍將並宜賜扈蹕功臣

封命婦邑號詔

昨皇太后爰自北京歸於大內旋膺典冊正位宮闈載詳  
邦國舊規合有命婦貢表宜稽邃古以示新恩應内外文  
武官妻可據品秩高卑各封邑號

令諸道節度使等洛京修宅詔

朕刷盪妖氛收復京輦三靈胥悅萬國駿奔凡在照臨畢  
同欣戴或出司土宇入覲朝廷若無列第於神州何表愛  
君之誠節諸道節度觀察防禦團練刺史等並宜令洛京  
修宅一區旣表皇都之壯麗復佳清洛之浩穰因我后之

化家覩羣居之戀闕

減東京賦稅詔

間者以皇綱中墜國步多艱率兵甲於兩河漲烟塵於千里憂勤二紀勞役萬端矧乃東京國號大名雄稱全魏昔惟廣晉今實興唐自朕南北舉兵高低叶力總六州之疆土供萬乘之征租有飛芻輓粟之勞有浚壘深溝之役賦重而民無嗟怨務繁而士竭忠勤致於掃盪氛霾平除僞逆九廟復烝嘗之薦兆人息塗炭之災靜想夤緣深所嘉歎昨者因追曩素載洽歌謠俱懸望幸之誠遂舉省方之

典爰臨管界洎至都城對父老之歡呼睠懷斯契睹井田  
之凋廢臨馭增慚得不特降優恩俾蘇舊地冀表寵綏之  
道免渝敦激之風應東京隨絲鹽錢每兩俱減放五文逐  
年俵賣蠶鹽食鹽大鹽甜次冷鹽每斗與減五十文藥鹽  
與減三十文其小菜豆稅每畝長與減放三升都城内店  
宅園圃比來無稅頃因僞命遂有配徵後來原將所徵物  
色添助軍人衣賜將令通濟宜示矜蠲今據緊慢去處於  
見輸稅絲上每兩作三等酌量納錢貴與充本迴圖收市  
軍人衣賜其絲永與除放所有六街内空間田地並許新

歸業人戶逐便蓋舍居止與免差徭如是本主未來一任坊隣收佃庶令康泰俾表優恩

駕還洛京詔

朕以削平僭亂底定寰區爰宅洛都再踰星歲乃睠興王之地頗聆望幸之辭暫議省巡以慰羣品因茲駐蹕俄已經春優恩旣洽於大名車駕宜還於中土俾宣遐邇咸暢昇平可定此月十七日發程取河陽舊路歸洛

定考試例詔

起今後宜準開成三年勅文凡有官者並詣吏曹未仕者

皆歸禮部其童子則委本州府依諸色舉人例考試結解  
送省任稱鄉貢童子長吏不得表薦若無本處解送本司  
不在考試之限

求言詔

朕聞古先哲王臨御天下上則以無偏無黨爲至治次則  
以足食足兵爲遠謀緬維前修誠可師範朕纂承鳳歷嗣  
守鴻圖三載於茲萬幾是總非不知五兵未弭兆庶多艱  
蓋賴卿等寅亮居懷康濟爲務冀盡賦輿之理洞詢盡徹  
之規今則潛按方區備聆謠俗或力役罕均其勞逸或賦

租莫辨於後先但以督促爲名煩苛不已被甲冑者何嘗  
充給趨朝省者轉困支持州閭之貨殖全䟽天地之災祥  
屢應以至星辰越度旱澇不時農桑失業於邱園道殣相  
望於郊野生靈及此寢食寧遑豈非朕德政未孚焦勞自  
掇者耶朕昨親援毫翰軫念瘡痍一則詢爾謀猷一則表  
予宵旰未披來奏轉撓於懷敢不翼翼罪躬乾乾軫慮咨  
爾四岳弼予一人何不舉爾賢才輔予寡昧百辟之內羣  
后之間莫不有盡忠者被掩其能抱器者難陳其力或草  
澤有遺逸之士山林多屈滯之人爾所不知吾將安訪卿



等位尊調鼎名顯代天旣逢不諱之朝何忤繇中之說當  
宜厯告中外急訪英髦應在任及前資文武官下至草澤  
之士有濟國治民除姦革弊者並宜各獻封章朕當選擇  
施行其近宣御札亦可告諭內外體朕意焉